



Pou Piblikasyon Imedya: 22/12/2022

GOUVÈNÈ KATHY HOCHUL

GOUVÈNÈ HOCHUL ANONSE DE PWOJÈ TRANSFÒMATÈ NAN NIAGARA FALLS POU ATIRE NOUVO VIZITÈ AK DEVLOPMAN

Aquarium of Niagara pral kòmanse konstriksyon sou Great Lakes 360 nan Mize Niagara Gorge ki fèmen; Pwogrè sou pwojè pòtay eritaj Niagara Falls la ap kontinye

Tou de pwojè yo pral ede rekonekte popilasyon Niagara Falls nan vwa navigab yo ki defini idantite vil la

Reprezantasyon grafik Great Lakes 360 yo disponib [isit la](#)

Reprezantasyon grafik pwojè Pòtay Eritaj Niagara Falls la disponib [isit la](#)

Gouvènè Kathy Hochul te anonse jodi a de pwojè transfòmatè nan Niagara Falls ki pral atire nouvo rezidan, vizitè ak devlopman nan anba lavil la epi ede rekonekte popilasyon an nan Niagara Falls ak vwa navigab yo ki defini idantite Vil la. Pwojè Pòtay Eritaj Niagara Falls (Niagara Falls Heritage Gateways), ki gen ladan senk fonksyon pòtay publik ki gen entansyon pou ankouraje re-envestisman nan Niagara Falls, pral kontinye. Anplis de sa, Biwo Pak, Lwazi ak Prezèvasyon Istorik (Office of Parks, Recreation and Historic Preservation, OPRHP) Eta New York la te apwouve yon akò ki otorize Aquarium of Niagara (Akwaryòm Niagara) pou jere operasyon nan Sant Dekouvèt Niagara Gorge (Niagara Gorge Discovery Center) ki fèmen kounye a. Konstriksyon an pral kòmanse kounye a pou transfòme Sant Dekouvèt Niagara Gorge la nan Great Lakes 360 — yon nouvo espas enteresan pou eksposizyon ki konsantre sou Great Lakes yo.

"N ap fòme yon nouvo chemen pou Niagara Falls - fè envestisman sible ki pral ede atire touris ak transfòme kominote a", **Gouvènè Hochul te deklare.** "Pwojè Pòtay Eritaj Niagara ak Great Lakes 360 pral pote nouvo devlopman enteresan nan anba lavil la, atire nouvo vizitè, ankouraje ekonomi lokal la epi fè kominote a tounen yon pi bon kote pou viv".

Pwojè Pòtay Eritaj Niagara Falls

Pwojè Pòtay Eritaj Niagara Falls ki koute 12 milyon dola a konsantre sou pwent nò ak sid yon pwopozisyon "Chemen Eritaj Anba Lavil Niagara Falls" (Downtown Niagara

Falls Heritage Path) ki vize elaji aktivite anba lavil pandan l ap ranfòse koneksyon ant anba lavil Niagara Falls ak Pak Eta Niagara Falls. Yo te seleksyone Practice for Architecture and Urbanism (PAU) ki baze nan New York, ki te dirije devlopman yon estrateji devlopman konseptyèl pou zòn anba lavil la an 2021, pou dirije konsepsyon an. Ou ka jwenn reprezantasyon konseptyèl yo [isit la](#).

Dimansyon Pwojè Pòtay la pral gen ladan:

- Re-entèprete yon ti bout nan kanal idwolik istorik Niagara Falls Power Company (Konpayi Elektrik Niagara Falls) a kòm yon plas piblik enteresan ki demontre istwa pwodiksyon elektrisite a gwo echèl ak efè li sou sosyete Ameriken an nan konsepsyon li.
- Konstwi yon platfòm obsèvasyon sou fwontyè Pak Eta Niagara Falls, ki aksesib apati Buffalo Avenue epi ki konekte atravè yon eskalye ak pak la li menm, avèk vi panoramik sou American Rapids ak Goat Island. Konsepsyon an pral prezèv kouvèti pyebwa ki egziste deja epi bay opòtinite pou chita deyò.
- Transfòme Pak DiFranco pou tounen yon pavyon ki gen plizyè itilizasyon pou pèfòmans deyò, Iwazi ak espas rasanbleman piblik, an patenarya ak Vil Niagara Falls.
- Kreye yon pak pòch nan kwen Buffalo Avenue ak 1st Street ki pral bay repo epi aktive peyizaj lari a.
- Etabli yon pak entèpretasyon nan sit istorik Cataract House Hotel la pou rakonte istwa chemen fewovyè klandestin an ak kijan anplwaye otèl Afwo-Ameriken yo te jwe yon wòl enpòtan nan ede moun ki t ap chèche libète yo sove ale Kanada.

Pandan ane 2020 ak 2021 USA Niagara Development Corporation (Kòporasyon Devlopman Niagara nan Etazini) — yon sipòtè Empire State Development — ak Practice for Architecture and Urbanism (PAU) te elabore yon estrateji pou reyamenajman plizyè pwopriyete vid oswa ki pa ase itilize nan Niagara Falls, ke yo te akeri an 2018 kòm yon pati nan yon pwogram estratejik akizisyon tè ki finanse atravè Eta New York. "[Estrateji Devlopman Anba Lavil Niagara Falls](#)" la demontre yon seri entèvansyon pwovizwa ak direktiv devlopman posib pou reyimajine yon anba lavil dinamik akoutèm pandan l ap kreye yon dinamis epi kontinye ankouraje kwasans ak devlopman dinamik dirab pi devan. Pwojè Pòtay Eritaj Niagara Falls la dekoule de estrateji sa a epi li gen ladan plizyè nan entèvansyon pwovizwa yo rekòmande pou aktive pasèl yo anvan devlopman sektè prive a.

Eta a finanse pwojè Pòtay Eritaj Niagara Falls la ak 10 milyon dola atravè Buffalo Billion II ak 2 milyon dola atravè Patenarya Revitalizasyon Rejyonal la. Yo prevwa konstriksyon pwojè a an 2024.

Pwojè Sant Dekouvèt Niagara Gorge

Pwojè 5 milyon dola Great Lakes 360 la pral yon mize vivan ki mete aksan sou bét sovaj nan Rivyè Niagara ak pi gwo ekosistèm Great Lakes la pandan y ap selebre istwa jewolojik inik zòn nan. Objektif pwojè a sou konsepsyon ekspozisyon aksesib pral transfòme biling lan nan yon destinasyon inik kote vizitè ki gen tout laj ak tout kapasite

yo ka dekouvrir istwa ekolojik rejyon an pandan tout ane a. Pwojè fini an pral ogmante kantite ekspozisyon vivan nan akwaryòm lan nan 40 pouzan. Gade reprezantasyon grafik yo [isit la](#).

Sant Dekouvèt Niagara Gorge la, ke yo rele tou Mize Jewolojik Schoellkopf (Schoellkopf Geological Museum), pozisyone nan presipis Niagara Gorge epi li sitiye apèn nan 500 pye nan sidwès biling prensipal Akwaryòm lan. Dapre akò avèk Pak New York yo, Akwaryòm lan pral renove biling vid la, pou kreye nouvo espas pou ekspozisyon ki konsantre sou Great Lakes ki byen chita sou nouvo espas vèt ki te kreye gras a retrè ansyen Pwomnad Robert Moses ki te fèk fini an.

Great Lakes 360 finanse totalman apre yon sibvansyon kapital 1 milyon dola te anonse dènyèman atravè sibvansyon Market NY ak yon sibvansyon ESD 675,000 dola yo te anonse deja. Lòt sipòtè yo enkli East Hill Foundation, Grigg Lewis Foundation, John R. Oishei Foundation, KeyBank ak First Niagara Foundation, M&T Charitable Foundation, Margaret L. Wendt Foundation, National Grid, Niagara County IDA, Niagara River Greenway an patenarya ak Vil Niagara Falls, ak Ralph C. Wilson, Jr. Legacy Funds. Pwojè a bati sou plis pase 10 milyon dola nan amelyorasyon kapital Akwaryòm lan te fè depi 2018 epi li demontre angajman Akwaryòm nan pou amelyore eksperyans vizitè yo atravè atrakson dinamik ak enteresan.

Paternitya sa a ant Pak, Lwazi ak Prezèvasyon Istorik Eta New York ak Aquarium of Niagara elaji anprent jeyografik Akwaryòm lan epi ouvri opòtinite pou Akwaryòm lan devlope yon prezans ki sanble ak yon kanpis nan anba lavil Niagara Falls. Ouvèti yon nouvo atrakson andedan ak pandan tout ane a nan lokal sa a kreye tou mas kritik nan yon zòn k ap devlope nan Pak Eta Niagara Falls.

Sant Dekouvèt Niagara Gorge la te louvri an 1971 anba jesyon Pak, Lwazi ak Prezèvasyon Istorik Eta New York la. Sitiye nan sit youn nan premye izin elektrik idwoelektrik nan Etazini, atrakson sezonye a te montre istwa natirèl Chit la ak Niagara Gorge. Li te fèmen pou publik la depi oktòb 2020. Nouvo patenarya ant Pak, Lwazi ak Prezèvasyon Istorik Eta New York la ak Aquarium of Niagara pral pote yon nouvo lavi nan espas sa a yon fason ki selebre istwa natirèl kote li ye a epi ki motive plis pase 200,000 vizitè chak ane pou pwoteje resous rich rejyon an pou jenerasyon k ap vini yo.

Prezidan, Direktè Egzekitif Jeneral ak Komisè Empire State Development lan, Hope Knight, te deklare, "Pwojè Pòtay Eritaj Niagara Falls la se yon premye etap nan estrateji Eta New York pou fè sit ki pa itilize depi lontan, ke Eta a gen kontwòl yo kounye a, tounen gen yon itilizasyon pwodiktif. Sa pral ogmante baz taks vil la epi kontribiye nan yon anba lavil dinamik k ap emèje ankò ki pral atire vizitè ak rezidan yo".

Komisè Pak Eta New York la, Erik Kulleseid, te deklare, "State Parks fyè pou l fè patenarya ak Awaryòm Niagara pou reytilize enstalasyon inik sa a. Li trè awopriye pou rakonte istwa Great Lakes yo epi li pral konplete enstalasyon prensipal la pandan l ap bay yon lòt opsyon pou lwazi pandan tout ane a nan Niagara Falls".

Manm Asanble Angelo Morinello te deklare, "Mwen remèsyé Gouvènè Hochul paske li kontinye pwojè ki konsantre sou Niagara Falls k ap kontinye vwayaj li kòm yon destinasyon touristik klas mondal. Vil nou an ak rejyon nou an konsantre sou atraksyon vèt ki kombine mèvèy natirèl nou an, Chit la, ak atraksyon ekotouristik ki mete aksan sou bèl mèvèy lanati ki antoure nou".

Majistra Vil Niagara Falls Ian Robert Restaino te deklare, "Niagara Falls kontinye kaptive vizitè yo ak moun nan lokalite yo avèk pouvwa ak bote li yo. Kreyasyon Pòtay Eritaj (Heritage Gateways) la pral bay plis opòtinite pou jwi mèvèy natirèl nou an epi pote lòt lokal pou amizman nan anba lavil la pou rejwenn ekspansyon eksitan Aquarium of Niagara nou an. Angajman Gouvènè Hochul pou leve kominote nou an pou fè avanse nouvo devlopman se yon opòtinite enteresan pou Vil nou an epi nou apresye sipò li kontinye bay".

Fondatè ak Direktè Kreyatif Practice for Architecture and Urbanism (PAU), Vishaan Chakrabarti, te deklare, "Nou kontan pou nou kontinye travay nou avèk Eta New York nan Niagara Falls avèk yon ekip agrandi ki gen ladan achitèk peyizaj Hargreaves Jones. Pwojè Pòtay Eritaj Niagara Falls la se yon chans pou montre kijan konsepsyon reflechi kapab retabli olye pou refè vil nou yo an kolaborasyon avèk kominote lokal la. Enfrastrikti publik nan sant ibanis ki gen siksè a—nou bat bravo pou Eta New York paske li defann espas publik ak achitekti ki konekte nou ak istwa nou yo, ak anviwònman nou yo, epi youn ak lòt".

Prezidan ak Direktè Egzekitif Jeneral Aquarium of Niagara, Gary Siddall, te deklare, "Vizyon nou pou espas sa a gen ladann yon eksperyans vrèman enklizif ak opòtinite pou avanti andedan ak deyò ki aksesib pou tout vizitè yo. Atravè abita vivan ak pwogram edikatif, envite yo pral dekouvri entèraksyson otantik avèk bêt ki enspire yo fè yon diferans pou lavi akwatik. Patenarya sa a vrèman bati sou objektif èstratejik Akwaryòm nan pou amelyore eksperyans envite yo, pozisyone Akwaryòm lan kòm yon resous rejyonal, epi devlope wòl nou nan konsèvasyon akwatik la".

Direktè Egzekitif East Hill Foundation, Kenneth Dulian, te deklare, "East Hill Foundation fyè pou I sipòte Aquarium of Niagara nan pwojè Great Lakes 360 li a. Akwaryòm lan te kontinyèlman demonstre kapasite li pou egzekite sou gwo pwojè kapital ki te fè yon enpak transfòmatè sou òganizasyon an ak pi gwo kominote a, epi Great Lakes 360 pral inisyativ ki pi inovatè li ankò. East Hill Foundation kontan anpil pou I kreye patenarya ak Akwaryòm nan pou ranfòse pozisyon òganizasyon an kòm yon ankray kiltirèl pou rejyon Niagara ak pi lwen".

Enfòmasyon sou Aquarium of Niagara

Aquarium of Niagara se yon òganizasyon 501(C)3 ki san bi likratif. Avèk kominote nou an ak patnè nou yo, nou selebre bèl mèvèy natirèl nou yo epi enspire moun yo pou fè yon diferans pou lavi akwatik. Nou abrite plis pase 120 espès diferan, ki gen ladan dis mamifè marin sove ak ki pa ka libere. Akwaryòm lan ouvri chak jou a 9 a.m pandan tout ane a, eksepte pou Nwèl ak Jou Aksyon Degras. Pou plis enfòmasyon, vizite: aquariumofniagara.org.

Enfòmasyon sou Empire State Development

Empire State Development se ajans devlopman ekonomik prensipal New York. Misyon ESD se pou pwomouvwa yon ekonomi ki djanm ak pwospè, ankouraje kreyasyon nouvo travay ak opòtinite ekonomik, ogmante resèt pou Eta a ak minisipalite li yo, epi fè ekonomi lokal yo vin estab ak divèsifye. Gras a itilizasyon prè, sibvansyon, kredi taks ak lòt fòm asistans finansye yo, ESD ap fè efò pou amelyore envestisman biznis prive ak kwasans pou sipòte kreyasyon travay epi sipòte kominate pwospè yo toupatou nan Eta New York. ESD se egalman ajans administratif prensipal k ap kontwole Konsèy Developman Ekonomik Rejyonal (Regional Economic Development Councils, REDCs) Eta New York la ak komèsyalizasyon "I LOVE NY", mak touristik anblematik Eta a. Pou jwenn plis enfòmasyon sou Konsèy Rejyonal yo ak Empire State Development, ale sou www.regionalcouncils.ny.gov ak www.esd.ny.gov.

Enfòmasyon sou Biwo Pak, Lwazi ak Konsèvasyon Istorik (Office of Parks, Recreation and Historic Preservation, OPRHP) Eta New York

Biwo Pak, Lwazi ak Prezèvasyon Istorik Eta New York la sipèvize plis pase 250 pak, sit istorik, santye rekreyatif, tèren gòlf, ranp lansman bato ak plis ankò, ki te resevwa yon kantite rekò 78.4 milyon moun an 2021. Pou plis enfòmasyon sou nenpòt nan zòn lwazi sa yo, vizite www.parks.ny.gov, telechaje aplikasyon mobil NY State Parks Explorer la gratis oswa rele nan 518.474.0456. Epitou, konekte sou [Facebook](#), [Instagram](#) ak [Twitter](#).

###

Lòt nouvèl disponib sou sit www.governor.ny.gov
Eta New York | Chanm Egzekitif | press.office@exec.ny.gov | 518.474.8418